

## Plateliū dvars

Plateliū graps Švaželis (Šuazelis) bova dėdėlė gers. Nuors aš negīvenau po anou, bet žmuonis liūb kuolīs ėr dėdėlė gailiejuos, verkė, ka Prancėjuo mērė puoni. Plateliūs kielė atmėnėmus. Klėbuons sakė po pamuoksla, kas tor gera šėrdi, ka sosėrinkto i bažnīcė pasėmėlstė. Pri monės ĩnomava dvė biednas senelės muotrėškas ėr atėjė dar sosiedė – tretė tuoki pati. Anuos tėik tuolėj nėgaliejė i Plateliūs aple posontras mīlės benoėtė, tik anuos galiedamuos verkė ė sakė, ka nuors ė grapienė bova, bet muotina. Ka jaunesnės tebėbovuom, ka liūbam ėtė laža, daržėninks ėssėves ravietė daržū, grapienė atės so tarnaitė, apveizies, kėik ĩr muotrėšku so mažās vākās ėr idous vākams atneštė drabužiū, pīraga, dounas, vo rodėni – vuobulū.

Jie dvarėškė sogaus nu medė bevagont ar kon kėta, rīkštū kėrta, bet je kas priės pri grapienės, paprašīs, ėr kaltė duovėnuos. Ėš medės biednėjė galiejė neštė šakas pasausės, bi tik nekėrta so kėrvio ar so pjūklo nėpjuovė. Ėr graps bova tuoks pat geruos šėrdėis.

Abo grapo bova geruos šėrdėis diel vėsū žmuoniū. Matītė jau ėš tuo, ka bažnīčiuo tėik daug žmuoniū sosėrinka – beieitė nėgaliejė, spūstės bova par grapienės atmėnėmus, vo korėi nėgaliejė bepaieitė, verkė. Tėi grapa, koris dabar gīven Plateliūs, buočė bova parsėkielė ėš Prancūzėjės. Tik patė bova prasts. So pospatiems liūb givens, bet kou anam bepadarīs. Sava mīlėmuosiems pospatiems liūob duovėnuos gīvenėmus. Pati už tou kremezīs, kap so medė pjūklo pjaus, vo nikumet nėpapjaus. Ka gims pospatė vāks, graps lėips atneštė paruodītė. Jie anam patėks, tā tou sau i gluoba paims: lės muokslus, dous paskou dvarė kuokė tarnistė. Vo jie kartās bus ne anuo a kuoks negražos, ta pasakis, ka ons ĩ ne mona, kėinuo nuors kėta.

*Papasakuojė Zubaviciėnė Marėjuona, 90 metu omžiaus Beržuora. Užrašė Mickevīcė Juozos 1930 m. rogpjūtė mienesie*

## Konėgaikštė Oginskė Ireniejaus „mėrtės“

Konėgaikštė Oginskė bova do bruolė – vėns gīvena Plungie, vo ontros – Rietavė. Rėitaviškis pėrka ginklus rusams muštė, buntou. „Imperatuorios pats davė valė ėr ikrėta i nevalė“, – sakė koėgaikštis. Ont jūras, kor sver vėsus tavuorus, svierė ėr Oginskė prekės. Vo smagoms bova dėdiesnis – rada ginklus. Mata, ka ont kuožna ginkla ĩr pasėrašės koėgaikštis. Pajiemė karalius ginklus ėr pavadėna konėgaikštis ont pėitu. Konėgaikštis pasakė vīrams:

– Vīrā, vīrā, rītu mėrsio!

Ons nenuoriejė vāzioutė pri karaliaus unt pėitu, nes žėnuojė, kas tən anuo lauk. Konėgaikštis pasėvadėna i rūmus i savi dėdėlė panaši šiaučio ė saka anam:



Atstatīts Plateliū dvara pastats. Mukienės Danutės portėgrapėjė

– Apsėdarīk mona drabužės, vo aš – tava.

Tumet atnešė dvė skleinīcės arbetas.

Konėgaikštis saka:

– To mona gerk, aš – tava.

Ka šiaučios ėsgierė, tujau pat numėrė, nes tuo skleinīčiuo bova trochos. Vo pats graps ėšvāziava už gruoņicės. Rusā atvāziava paveizietė, a tėkrā konėgaikštis ĩr mērės. Mata: grabė gol konėgaikštis. Nėgaliejė anuo atskėrtė nu šiaučiaus, nes tas bova tuokė pat augoma ėr ėšvaizdas kap konėgaikštis. Tėp cars ėr nesožėnuojė, ka konėgaikštis pasėtraukė i užsėini.

*Papasakuojė P. Brožos, 105 metu omžiaus Lėlėnės kaimė (Alsiediu valsčiu) 1927 metu lėipas 15 dėina. Užrašė Mickevīcė Juozos*



Konėgaikštū Oginskiu dvara rūmā Rietavė XX omžiaus pradiuo. Puotuograps nežėnuoms. Portėgrapėjė iš Rėitavo Oginskiu kultūras istuorėjės muziejaus rinkiniū